

奉和初春幸太平公主南莊應制

傳聞銀漢支機石。復見金輿出紫微。織女橋邊烏鵲起。仙人樓上鳳皇飛。流風入座飄歌扇。瀑水侵階澣舞衣。今日還同犯牛斗。乘槎共逐一作泛海潮歸。

王灣

王灣。洛陽人。登先天進士第。開元初。爲滎陽主簿。馬懷素請校正羣籍。召學涉之士。分部譔次。灣在選。中祕書罷譔。又與陸紹伯等同校麗正院書。終洛陽尉。灣詞翰早著。其海日生殘夜。江春入舊年之句。當時稱最。張說手題於政事堂。每示能文。令爲楷式。詩十首。

奉使登終南山

常愛南山遊。因而盡原隰。數朝至林嶺。百仞登崑崙。石壯一作狀馬徑一作經窮。苔色步緣入。物奇春狀一作貌改。氣遠天香集。虛洞策杖鳴。低雲拂衣溼。倚巖見廬舍。入戶欣拜揖。問性矜勤勞。示心教澄習。玉英時共飯。芝草爲余拾。境絕人不行。潭深鳥空立。一乘從此授。九轉兼是給。辭處若輕飛。憩來唯吐吸。閒一作開襟超已勝。迴路條而及。煙色松上深。水流山下急。漸平逢車騎。向晚睨城邑。峯在野趣繁。塵飄宦情澀一作緝。辛苦久爲吏。勞生一作榮進何妄執。日暮懷此山。悠然賦斯一作新什。

晚夏馬嵬一作升卿叔池亭即事寄京都一二知己

忝職畿甸淹。濫陪時俊一作英後。才輕策疲劣。勢薄常驅走。牽役勞風塵。秉心在巖藪。宗賢開別業。形勝

代希偶。竹繞清渭濱。一作渭。泉流白渠口。遂巡期賞會。揮忽變星斗。逮此乘務閒。一作餘。因而訪幽叟。入來殊景物。行復洗紛垢。林靜秋色多。潭深月光厚。盛香蓮近拆。新味瓜初剖。滯拙懷隱淪。書之寄良友。

麗正殿賜宴同勒天前煙年四韻應制

金殿忝陪賢。瓊羞忽降天。鼎羅仙掖裏。觴拜瑣闈前。院逼青霄路。廚和紫禁煙。酒酣空忭舞。何以答昌年。

奉和賀監林月清酌

華月當秋滿。朝英一作軒。假興同。淨林新霽入。規一作窺。院小一作早。涼通。碎影行筵裏。搖花落酒中。清宵凝爽意。併此助文雄。

次北固山下

客路青山外。行舟綠水前。潮平兩岸闊。風正一帆懸。海日生殘夜。江春入舊年。鄉書何處達。歸雁洛陽邊。河岳英靈集題作江南意。詩云。南國多新意。東行伺早天。潮平兩岸失。風正數帆懸。海日生殘夜。江春入舊年。從來觀氣象。惟向此中偏。

觀搗箏一作祖詠詩

虛室有秦箏。箏新月復清。弦多弄委曲。柱促語分明。曉怨凝繁手。春嬌入曼一作慢。聲。近來唯此樂。傳得美人情。

晚春詣蘇州敬贈武員外